

Maet yu fesem situesen ya we wan narafala man i aksesem ol data blong yu o i hakem akaon blong yu long intanet. Hem i impoten tumas blong haedem gud ol infomesen blong yu we i stap long intanet, mo yu mas manajem gud ol nem mo ol paswod blong yu, sipos no, wan i save stilim mo profite long hem.

Hemia nao trifala samting we yu save mekem blong putumgud ol infomesen blong yu i stap sef:

1. **Setemap** ol strong paswod mo [yusum sistem blong mas gat tufala rod blong pruvum aedentiti](#) blong mekem i had tumas blong narafalaman i save aksesem o stilim ol infomesen blong yu long intanet.
2. **No foget blong logaot** - no livim ol intanet pej mo akaon blong yu oli open i stap, mo hemia i tru tumas sipos yu stap letem wan narafala man i save yusum telefon, tablet o kompiuta blong yu. Simpol samting ya nomo i save blokem ol narafala man blong oli no save aksesem akaon blong yu wetem ol infomesen blong yu.
3. **Setemap ol notis blong login** we i minim se bambae yu save faenemaot evri taem we wan narafala man i traem aksesem wan akaon blong yu long intanet.

Wan strong paswod i olsem wanem?

Taem yu yusum wan paswod, yu stap protektemgud ol infomesen blong yu, mo yu stap blokem ol narafala man blong oli no save aksesem imel mo sosel midia blong yu, o eni narafala samting blong yu we i stap long intanet. Hem i olsem wan wod o nem we yu nomo yu krietem mo insaed long hem i save gat ol leta, ol namba mo ol narafala saen.


Hemia nao faev gudfala tingting blong folem, blong mekem se paswod blong yu i strong gud:

1. Mekem paswod blong yu i had tumas blong narafala man i save traem faenemaot - i moa gud blong yusum ol leta mo ol saen olbaot nomo.
2. Mekem paswod blong yu i gat sikis leta, o i bitim sikis, mo inkludum samfala namba, samfala leta, mo samfala saen (olsem \$, # or &)
3. Yusum ol defdefren paswod long ol wanwan akaon blong yu long intanet. Olsemia, sipos wan i faenemaot wan paswod blong wan akaon blong yu long intanet, hem i no save aksesem ol narafala akaon blong yu tu.
4. No letem narafala man i save paswod blong yu.
5. Mekemsua se yu save tingbaot gud ol paswod blong yu!



Mi Mi Save Intanet

Tingtingbak



"Mi stap tingting gud mi wan fastaem, afta mi jes serem tingting i go"

Rispek



"Mi stap mekem long ol narafala man i olsem we mi wantem oli mekem long mi"

Aksen



"Mi stap folem ol sef mo stret fasin blong yusum intanet"



Save the Children



#MiMiSaveIntanet